

四庫全書

史部

欽定四庫全書

史部

明史卷二百四十六

給事中_臣劉涓覆勘

總校官編修_臣朱 鈐

欽定四庫全書

明史卷二十四

大學士張廷玉等奉 敕修

列傳第一百三十

滿朝薦

江東謙

侯震陽

王允成

李希孔
毛士龍

滿朝薦字震東麻陽人萬曆三十二年進士授咸寧知

縣有廉能聲後監梁永縱其下劫諸生索朝薦捕治之

永怒劾其擅刑稅役詔鐫一官大學士沈鯉等論救不
聽會巡撫顧其志極論永貪殘狀乃復朝薦官奪俸一
歲無何永遣人蠱巡按御史余懋衡事覺朝薦捕獲其
人永懼率衆擐甲入縣庭吏卒早為備無所掠而去城
中數夜驚言永反或謂永宜自明永遂下教自白不反
狀然蓄甲者數百而朝薦助懋衡操之急諸惡黨多亡
去朝薦追之渭南頗有所格傷永懼使使繫書髮中入
都訟朝薦刼上供物殺數人投屍河中帝震怒立遣使

逮治時三十五年七月也既至下詔獄榜掠遂長繫中外論救自大學士朱廣以下百十疏最後四十一年秋萬壽節將屆用大學士葉向高請乃與王邦才卞孔時並釋歸光宗立起南京刑部郎中再遷尚寶卿天啟二年遼東地盡失海內多故而廷臣方植黨逞浮議朝薦深慮之疏陳時事十可憂七可怪語極危切尋進太僕少卿復上疏曰比者風霾曠晦星月晝見太白經天四月電六月冰山東地震畿內霰潦天地之變極矣四川

則奢崇明叛貴州則安邦彥叛山東則徐鴻儒亂民人之變極矣而朝廷政令乃顛倒日甚一乞骸耳周嘉謨劉一燝顧命之元老以中讒去孫慎行守禮之宗伯以封典去王紀執法如山之司寇以平反去皆漠不顧惜獨惓惓於三十疏劾之沈淮即去而猶加異數焉祖宗朝有是顛倒乎一建言耳倪思輝朱欽相等之削籍已重藉口之嗟周朝瑞惠世揚等之拂衣又中一網之計祖宗朝有是顛倒乎一邊筴耳西部索百萬之貲邊臣

猶慮其未飽健兒乞錙銖之餉度支尚謂其過奢祖宗
朝有是顛倒乎一棄城耳多年議確之犯或以庇厚而
緩求旬日矜疑之輩反以妬深而苛督祖宗朝有是顛
倒乎一緝奸耳正罪自有常律平反原無濫條遼陽之
禍起於袁應泰之大納降人降人盡占居民婦女故遼
民發憤招敵攻城事發倉卒未聞有何人獻送之說也
廣寧之變起於王化貞之誤信西部取餉金以啖挿而
不給卒伍以故人心離散敵兵過河又不聞西部策應

遂至手足無措抱頭鼠竄亦事發倉卒未聞有何人獻
送之說也深求奸細不過為化貞卸罪地耳王紀不欲
殺人媚人反致削籍祖宗朝有是顛倒乎若夫閣臣之
職在主持清議今章疏有姤才壞政者非惟不斥也輕
則兩可重則竟行其言矣有殛奸報國者非惟不納也
輕則見讓重則逆加黜罰矣尤有恨者沈淮賄盧受得
進及受敗又交通跋扈之奄以樹威振瑾僨裂之禍皆
淮作俑而放流不加他若戚畹豈不當檢何至以閣寺

之讒斃其三僕三宮分有常尊何至以傾國之昵僭逼母儀此皆顛倒之甚者也顧成於陛下者什之一二成於當事大臣者十之八九臣誠不忍見神州陸沈祈陛下終覽臣疏與閣部大臣更絃易轍悉軌祖宗舊章臣即從逢干於地下猶生之年既奏魏忠賢激帝怒降旨切責褫職為民大學士向高申救甚力帝不納已忠賢黨撰東林同志錄朝薦與焉竟不復用崇禎二年薦起故官未上卒

江秉謙字兆豫歙人萬曆三十八年進士除鄞縣知縣用廉能徵擬授御史久不得命以塋親歸光宗立命始下入臺侃侃言事天啟元年首陳君臣虛己奉公之道規切甚至戶部尚書李汝華建議興屯請專遣御史三年課績所墾足抵年例餉銀即擢京卿秉謙力駁其謬因言汝華尸素宜亟罷汝華疏辨秉謙再劾之藩陽既失朝士多思熊廷弼而給事中郭鞏獨論廷弼喪師悞國請并罪閣臣劉一燝秉謙憤力頌廷弼保守危疆功

且曰今廷弼勘覆已明議者猶以一人私情沒天下公
論寧壞朝廷封疆不忘胸中畛域章下廷議會遼陽復
失廷弼旋起經畧鞏坐妄議奪官遂與秉謙為讐廷弼
既鎮山海議遣使宣諭朝鮮發兵牽制副使梁之垣請
行廷弼喜請付二十萬金為軍貲兵部尚書張鶴鳴不
予秉謙抗疏爭鶴鳴怒力詆秉謙朋黨秉謙疏辨帝不
罪鶴鳴既抑廷弼專庇巡撫王化貞朝士多附會之帝
以經撫不和詔廷臣議秉謙言陛下再起廷弼安以重

寄曰疆場事不從中制乃數月以來廷弼不得措手足
呼號日聞辨駁踵至執為詞者曰經撫不和化貞主戰
廷弼主守耳夫廷弼非專言守謂守定而後可戰也化
貞銳意戰即戰勝可無事守乎萬一不勝又將何以守
此中利害夫人知之乃一則無言不從一則無策不棄
豈真不明於戰守之說但從化貞廷弼起見耳陛下既
命廷弼節制三方則三方之進戰退守當一一聽其指
揮乃化貞欲進則使廷弼從之進欲退則使廷弼隨之

退化貞修進條退則使廷弼進不知所以戰退不知所
以守是化貞有節制廷弼之權而廷弼未嘗有節制三
方之權也故今日之事非經撫不和乃好惡經撫者不
和非戰守之議論不合乃左右經撫者之議論不合請
專責廷弼實圖戰守末譏首輔葉向高兩可含糊勢必
兩可掣肘安能責成功語極切至後朝議方撤廷弼而
化貞已棄廣寧遁秉謙益憤以職方郎耿如杞附和鶴
鳴力助化貞排廷弼致封疆喪失連疏攻之并援世宗

戮丁汝夔故事乞亟寘鶴鳴於法帝以鶴鳴方行邊不當輕詆奪秉謙俸半歲如杞不問秉謙復上疏言鶴鳴一入中樞初不過鹵莽而無遠識既乃至兇很而動殺機明知西部間諜俱虛戰守參差難合乃顧自欺以欺朝廷何處有機會而曰機會可乘何日渡河而曰渡河必勝既欲驅經畧以出關而不肯付經畧以節制既欲置廷弼於廣寧而未嘗移化貞於何地破壞封疆之罪可置弗問哉且化貞先棄地先逃猶曰功罪相半即此

一言縱寸斬鶴鳴不足贖其欺君悞國罪乃猶敢哆口
定他人罪案耶當是時大學士沈淮潛結中官劉朝乳
媼客氏募兵入禁中興內操給事中惠世揚周朝瑞等
十二人再疏力攻秉謙與馬弁詆朝及客氏內外胥怨
遂假劾鶴鳴疏出秉謙於外無何郭鞏召還交通魏忠
賢力沮秉謙是冬皇子生言官被謫者悉召還獨秉謙
不與家居四年聞忠賢益亂政憂憤卒居數月忠賢黨
御史卓邁追劾秉謙保護廷弼遂削籍崇禎初復官

侯震暘字得一嘉定人祖堯封監察御史忤大學士張居正外轉累官至福建右參政有廉直聲震揚舉萬厯三十八年進士授行人天啟初擢吏科給事中是時保姆奉聖夫人客氏方擅寵與魏忠賢及大學士沈淮相表裏勢跋張甚既遣出宮熹宗思念流涕至日旰不御食遂宣諭復入震暘疏言宮闈禁地姦瑇羣小睥睨其側內外鈎連借叢煬竈有不忍言者王聖寵而煽江京李閨之奸趙嬈寵而構曹節皇甫之變么麼里婦何堪

數昵至尊哉不省會遼事棘經畧熊廷弼巡撫王化貞
相抵牾兵部尚書張鶴鳴右化貞議者遂欲移廷弼與
化貞畫地任事震暘逆知其必敗疏言事勢至此陛下
宜遣問經臣果能加意訓練則進止遲速不從中制雖
撤撫臣一以付之無不可者如不然則督其條晰陳奏
以聽吏議撫拾殘局專任化貞此一說也不則移廷弼
密雲而出本兵為經畧鶴鳴素慷慨自命與其事敗同
罪不若挺身報國此又一說也不則遂以經畧授化貞

擇沈深有謀者代任巡撫以資後勁此又一說也不則直移廷弼於登萊終其三方布置之策與化貞相掎角此又一說也若復遷延猶豫必債國事疏上方有旨集議而

大清兵已破廣寧矣化貞廷弼相率入關門猶數奉溫旨責以戴罪立功震暘大憤懣再疏言臣言不幸驗矣為今日計論法不論情河西未壞以前舉朝所惜者什七在化貞今不能為化貞惜也河西既壞以後舉朝所

寬者什九在廷弼今亦不能為廷弼寬也策撫臣者謂
宜責令還赴廣寧聯屬西部然而詹庫已竭其能赤手
效包胥乎策經臣者謂宜仍責守關然所謂守者將如
廷弼前議三十萬兵數十萬餉以圖後效乎抑止令率
殘卒出關外姑示不殺乎凡此無一可者及今不定逃
臣之律殘疆其奚賴焉其後治失事罪蓋畧如震暘疏
云已遂劾大學士沈淮結納奉聖夫人及諸中官為朋
黨具發其搆殺故監王安狀忠賢即日傳旨謫震暘震

賜陞辭復上田賦河渠二議以逐臣不當建議再鑄二級以歸震暘在垣八月章奏凡數十上崇禎初召復故官震暘已前卒因其子主事峒曾請特贈太常少卿方震暘之論客氏也給事中祁門倪思輝臨川朱欽相疏繼之帝大恚並貶三官大學士劉一燝尚書周嘉謨等交章論救皆不納御史吳縣王心一言之尤切帝怒貶官如之心一同官龍谿馬鳴起復抗疏諫且言客氏六不可留帝議加重譴用一燝等言奪俸一年先是元年

正月客氏未出宮詔給土田二十頃為護墳香火貲又
詔魏進忠侍衛有功待陵工告竣並行敘錄心一抗疏
言陛下眷念二人加給土田明示優錄恐東方將士聞
而解體况梓宮未殯先念保姆之香火陵工未成強入
奄侍之勤勞於理為不順於情為失宜不報至是與思
輝欽相並貶廷臣請召還者十餘疏皇子生詔思輝欽
相心一鳴起並復故官欽相尋擢太僕少卿楊漣既劾
魏忠賢欽相亦抗疏極論五年以右僉都御史巡撫福

建討賊楊六蔡三鍾六等有功旋以忤忠賢除名思輝
崇禎時終南京督儲尚書心一終刑部侍郎鳴起終南
京右都御史

王允成字述文澤州人萬厯中舉於鄉除獲鹿知縣以
治行異等徵授南京御史時甲科勢重乙科多卑下之
允成體貌魁梧才氣颯發欲凌甲科出其上首疏論遼
左失事諸臣請正刑辟熹宗即位廷臣方爭論梃擊移
宮事而帝降兩諭罪選侍因言移宮後相安狀大學士

方從哲封還上諭允成陳保治十事中言張差闖宮說者謂瘋癲青宮豈發瘋之地龐保劉成豈並瘋之人言念及此可為寒心今鄭氏四十年之恩威猶在卵翼心腹實繁有徒陛下當思所以防之比者聖諭多從中出當則開煬竈之端不當而臣下爭執必成反汗之勢孰若事無大小盡歸內閣至元輔方從哲屢劾不去陛下於選侍移宮後發一敕諭不過如常人表明心跡耳從哲輒封還夫封后之命都督之命貶謫周朝瑞之命何

皆不封還司馬昭之心路人知之矣姚宗文閱視遼左
與熊廷弼相失歸而鼓同列攻之允成惡其奸再疏論
列天啟元年疏請卹先朝直臣列楊天民等三十六人
以上帝納之俄陳任輔弼擇經畧慎中樞專大帥更戎
政嚴賞罰數事末言方今最可慮者陛下孤立禁中先
朝怙權恃寵諸奄與今日左右近習互相忌嫉恐乘機
肆毒彼此相戕夫防護禁庭責在內閣及司禮務令潛
消默化俾聖躬與皇弟並得高枕無憂斯為根本至計

時避其言已劾刑部尚書黃克纘倡言保護選侍貽誤
賞繼春又曲庇盜竇內侍至辨御史焦源溥綱常一疏
刺謬特甚已極論內降及留中之害未復規切閭部大
臣忤旨停俸給事中毛士龍劾府丞邵輔忠允成亦偕
同官李希孔斥輔忠已極言綱紀廢弛請戒姑息破因
循指斥時事甚悉當是時中官劉朝魏進忠與乳媪客
氏相倚為奸允成抗疏歷數其罪畧言內廷顧命之璫
犬食其餘不蒙帷蓋之澤外廷顧命之老中旨趣出立

見田里之收以小馬為馳騁之資誰啟盤於遊田之漸以大臣為釋忿之地誰啟拂其考長之心劉朝輩初亦不預外事自沈淮邵輔忠導之遂恣肆無忌浸假而王心一倪思輝朱欽相斥矣浸假而司空用陪推矣浸假而中旨用考官矣是易置大臣之權在二豎也近者弄權愈甚逐大臣如振落王紀滿朝薦並削職為編氓是驅除大臣之權在二豎也科臣遷改自有定敘給假推陞往例皆然乃惡周朝瑞之正直忽有不許推用之旨

是轉遷百官之權在二豎也秦藩以小宗繼大宗諸子不得封郡王祖制昭然乃部科爭之不獲相繼而去是進退諸藩之權在二豎也招權納賄作福作威二豎弄權於外客氏主謀於中王振劉瑾之禍將復見今日疏入進忠輩切齒允成復特疏論秦府濫恩之謬帝終不省三年六月允成又劾進忠進忠益恨明年趙南星為吏部知允成賢調之於北未幾南星被逐御史張訥劾南星調允成非法遂除名後給事中陳維新復劾允成

賁險詔撫按提問坐以贓私莊烈帝嗣位以允成嘗請
保護皇弟識其名召復故官未幾卒當天啟初東林方
盛其主張聯絡者率在言路允成居南與北相應和時
貴多畏其鋒然諤諤敢言屢犯近倖其風采足重云李
希孔字子鑄三水人萬曆三十八年進士授中書舍人
擢南京御史給事中姚宗文閱遼東軍排經畧熊廷弼
希孔連疏劾之已又糾宗文阻抑考選以令旨二字抗
言繳還遇先帝非常之德泰昌元年冬陳時政七事天

啟改元與允成効卻輔忠已請宥言官倪思輝朱欽相
王心一三年上折邪議以定兩朝實錄疏言昔鄭氏謀
危國本而左袒之者莫彰著於三王並封之事今秉筆
者不謂非也且推其功至與陳平狄仁傑並此其說不
可解也當時並封未有旨輔臣王錫爵蓋先有密疏請
也迨旨下禮部而王如堅朱維京涂一臻王學曾岳元
聲顧允成于孔兼等苦口力爭又共責讓錫爵於朝房
於是錫爵始知大義之不可違而天下之不我予隨上

疏檢舉而封事停也假令如堅等不死爭不責讓將並封之事遂以定而子以母貴之說且徐邀定策國老之勛而乃飾之曰旋命旋引咎事遂以止嗟乎此可為錫爵諱乎哉且聞錫爵語人曰王給事中遺悔否以故事關國本諸臣稿項黃馘終錫爵世不復起不知前代之安劉復唐者誰阨王陵使之不見天日乎曾剪除張東之桓彥範等五人而今齋志以沒乎臣所以折邪議者一也其次莫彰於張差闖宮之事而秉筆者猶謂無罪

也且輕其事而列王大臣貫高事為辭此其說又不可解也王大臣之徒手而闖至乾清宮門也馮保怨舊輔高拱置刃其袖挾使供之非實事也張差之梃誰授之而誰使之乎貫高身無完膚而辭不及張敖故漢高得釋敖不問可與張差之事造謀主使口招歷歷者比乎昔寬處之以全倫今直筆之以存實以戒後自兩不相妨而奈之何欲諱之且諱之以為君父隱可也為亂賊輩隱則何為臣所以折邪議者二也至封后遺詔自古

未有帝崩立后者此不過貴妃私人謀假母后之尊以弭罪狀故稱遺詔以要必行奈何猶稱先志重誣神祖而陰為阿附傳封者開一面也臣所以折邪議者三也先帝之令德考終自不宜謂因藥致崩被不美之名而當時在內視病者烏可於積勞積虛之後投攻尅之劑羣議洶洶方蓄疑慮變之深而遽值先帝升遐又適有下藥之事安得不痛之恨之疾首頓足而深望之乃討奸者憤激而甚其詞庇奸者借題以逸其罰君父何人

臣子可以僥倖而嘗試乎臣所以折邪議者四也先帝之繼神廟棄羣臣也兩月之內鼎湖再號陛下孑然一身怙恃無託宮禁深閼狐鼠實繁其於杜漸防微自不得不倍加嚴慎即不然而以新天子儼然避正殿讓一先朝宮嬪萬世而下謂如國體何此楊漣等諸臣所以權衡輕重亟以移宮請也宮已移矣漣等之心事畢矣本未嘗居以為功何至反以為罪而禁錮之擯逐之是誠何心即選侍久侍先帝生育公主諸臣未必不力請

於陛下加之恩禮今陛下既安選侍又未嘗不安有何
冤抑而汲汲皇皇為無病之呻吟臣所以折邪議者五
也抑猶有未盡者神祖與先帝所以處父子骨肉之際
仁義孝慈本無可以置喙即當年母愛子抱外議謚諱
然雖有城社媒孽之奸卒不以易祖訓立長之序則愈
足見神祖之明聖與先帝之大孝何足諱何必諱又何
可諱若謂言及鄭氏之過便傷神祖之明則我朝仁廟
監國危疑何嘗為成祖之累而當時史臣直勒之汗青

並未聞有嫌疑之避也何獨至今而立此一說巧為奸人脫却使昔日不能寘之罪今日不容著之書何可訓也今史局開公道明而坐視奸輩陰謀辨言亂義將令三綱紊九法滅天下止知有私交而不知有君父乞特敕纂修諸臣據事直書無疑無隱則繼述大孝過於武周而世道人心攸賴之矣詔付史館參酌然其後卒不能改也已又請出客氏於外請誅崔文昇忌者甚衆指為東林黨未幾卒官故不與璫禍毛士龍字伯高宜興

人萬曆四十一年進士授杭州推官熹宗即位擢刑科給事中首劾姚宗文閱視乖張楊漣去國抗疏請留天啟改元正月疏論三案力言孫慎行陸夢龍陸大受何士晉馬德澧王之寀楊漣等有功社稷而魏浚輩配正害直之罪帝是之李選侍之移宮也其內豎劉朝田詔李進忠等五人以盜賢下刑部獄尚書黃克纘庇之數稱其寃帝不從論死是年五月王安罷魏進忠用事詔等進重賂令其下李文盛等上疏鳴寃進忠即傳旨貸

死大學士劉一燝等執奏者再旨下刑科士龍抄參者
三旨幾中寢克纘乃陳其冤狀而請付之熱審進忠不
從傳旨立釋士龍憤劾克纘阿旨骫法不可為大臣且
數朝等罪甚悉由是進忠及諸奄銜士龍次骨進忠廣
開告密誣天津廢將陳天爵交通李永芳逮其一家五
十餘人下詔獄士龍即劾錦衣駱思恭及誣告者罪進
忠憾張后抑已誣為死囚孫二所出布散流言士龍請
究治妖言奸黨并主使逆徒進忠益憾至九月士龍劾

順天府丞邵輔忠奸貪希孔允成亦劾之輔忠大懼朝等因誘以超擢令攻士龍輔忠遂訐士龍官杭州時盜庫納妓進忠從中下其疏尚書周嘉謨等言兩人所訐風聞請寬貸進忠不從削士龍籍輔忠落職閒住進忠後易名忠賢顯盜國柄恨士龍未已四年冬令其私人張訥劾之再命削籍明年三月入之汪文言獄詞謂納李三才賄三千謀起南京吏部下撫按提訊追贓遣戍平陽衛已而輔忠起用驟遷兵部侍郎六年十二月御

史劉徽復撫輔忠前奏劾士龍納訪犯萬金下法司逮
治士龍知忠賢必殺己夜中踰牆遁其妾不知也謂有
司殺之被髮號泣於道有司無如之何士龍乃潛至家
載妻子浮太湖以免莊烈帝嗣位忠賢伏誅朝士為士
龍稱冤詔盡赦其罪士龍始詣闕謝恩且陳被陷之故
帝憐之命復官致仕竟不召用至崇禎十四年里人周
延儒再相始起漕儲副使督蘇松諸郡糧明年冬入為
太僕少卿又明年春擢左僉都御史時左都御史李邦

華副都御史惠世揚皆未至士龍獨掌院事帝嘗語輔臣往例御史巡方類微服訪民間近高牙大纛氣凌巡撫且公署前後皆通寶納賄每奉使富可敵國宜重懲士龍聞劾逮福建巡按李嗣京十月謝病歸國變後卒贊曰滿朝薦健令也出死力以抗兇鋒幽深牢而弗悔及躋言路益發憤時事庶幾彊立不反者歟江秉謙侯震暘之論經撫李希孔之論三案皆切中事理王允成直攻劉朝魏忠賢而不與楊左周黃諸人同難毛士龍

顧以譎免蓋忠賢殺人皆成於附闇邪黨彼其甘心善
類授之刃而假手焉且加功者罪更浮於忠賢已

明史卷二百四十六

欽定四庫全書

明史卷二百四十六考證

滿朝薦傳諸惡黨多亡去朝薦追之渭南頗有所格傷
臣方煒按是時永黨王九功等齎重寶詐為上供
持兵器結陣行而所遣貢馬者已乘傳先發九功等
急馳欲追及與俱出關朝薦見郵傳去久而九功等
後至無驗遂遣民兵追之渭南殪數人盡奪其裝見
明紀事本末謹附識

滿朝薦傳疏陳時事至危切臣方煒按朝薦所陳十

可憂七可怪明實錄諸書均無可考謹識

江秉謙傳瀋陽既失朝士多思熊廷弼而給事中郭鞏
獨論廷弼喪師誤國請并罪閣臣劉一燝秉謙憤力
頌廷弼保危疆功臣方煒按是時秉謙疏中並劾
鞏排擠廷弼罪見明紀事本末謹附識

江秉謙傳會遼陽復失廷弼旋起經畧鞏坐妄議奪官

臣方煒按鞏奪官時並貶御史馮三元張脩德給

事魏應嘉三秩黜給事姚宗文名皆前劾廷弼者御史
劉廷宣救之亦被斥見明實錄謹附識

江秉謙傳當是時大學士沈漼潛結中官劉朝乳媪客
氏募兵入禁中興內操臣方煒按漼是時密結朝

等奏言遼左用兵方急臣謹於東陽義烏諸邑募材
官勇士二百餘請以勇士隸錦衣而量受材官職朝等
方舉內操得奏大喜乃詔錦衣訓練募士而授材官
王應斗等游擊以下官有差見明實錄謹附識

候震暘傳保姆奉聖夫人客氏方擅寵與忠賢及大學士沈瀧相表裏勢蹇張甚既遣出官熹宗思念流涕至日盱不御食遂宣諭復入臣方煒按客氏之出而復召入也侍郎陳邦瞻御史周宗建皆先後力爭俱被詰責見明紀事本末謹附識

候震暘傳大學士劉一燝尚書周嘉謨等交章論救皆不納臣方煒按是時與一燝嘉謨等同論救者為侍郎王德完給事中李遇知御史方遠宜見孫承澤

春明夢餘錄謹識

王允成傳允成陳保治十事

臣方煒按允成所陳保

治十事明實錄諸書皆無可考謹識

王允成傳李希孔附泰昌元年冬陳時政七事

臣方

煒按希孔所陳時政七事明紀事本末諸書皆無可

考謹識

明史卷二百四十六考證

欽定四庫全書

明史卷二百四十七

大學士張廷玉等奉 敕修

列傳第一百三十五

劉 綈 喬一珩

李應祥 童元鎮

陳 璘 吳 廣

鄧子龍

馬孔英

劉綈字省吾都督顯子勇敢有父風廕為指揮使萬歷

初從顯討濟蘓蠻先登擒其酋阿勒達以功遷雲南迤
東守備改南京小教場坐營十年冬緬甸犯永昌騰越
巡撫劉世曾請濟師明年春擢銚遊擊將軍署騰衝守
備事緬甸去雲南遠自其酋莽瑞體以兵服諸番勢遂
強數擾邊境江西人岳鳳者商隴川驍桀多智為宣撫
多士寧記室士寧妻以妹鳳誘士寧往見瑞體潛與子
翼烏酖殺之并殺其妻子奪金牌印符受瑞體偽命代
士寧為宣撫瑞體死子應裏嗣鳳結耿馬賊罕虔南甸

土舍刀落參芒市土舍放正堂與應裏從父猛別弟阿
瓦等各率象兵數十萬攻雷弄蓋達干崖南甸木邦老
姚思甸諸處殺掠無算窺騰越永昌大理蒙化景東鎮
沅元江已陷順寧破蓋達又令叢烏引緬兵突猛淋指
揮吳繼勲等戰死鄧川土官知州何鈺鳳僚壻也使使
招之鳳繫獻應裏當是時車里八百並養木邦孟艮孟
密蠻莫皆以兵助賊賊勢益盛黔國公沐昌祚聞警移
駐洱海巡撫劉世曾亦移楚雄大徵漢土軍數萬令參

政趙睿壁蒙化副使胡心得壁騰衝陸通霄壁趙州僉
事楊際熙壁永昌與監軍副使傅寵江忻督參將胡大
賓等分道進擊大小十餘戰積級千六百有奇猛別落
參皆殪參將鄧子龍擊斬罕虔于姚關應裏趨鳳東寇
姚關北據灣甸芒市會緹至軍軍大振鳳懼乃令妻子
及部曲來降緹責令獻金牌印符及蠻莫孟家地乃以
送鳳妻子還隴川為名分兵趨沙木籠山據其險而已
馳入隴川境鳳度四面皆兵遂詣軍門降緹復率兵進

緬緬將先遁留少兵隴川緝攻之鳳子曩烏亦降緝乃
攜鳳父子往攻蠻莫乘勝掩擊賊窘縛緬人及象馬來
獻蠻莫平遂招撫孟養賊賊將乘象走追獲之復移師
圍孟璉生禽其魁雲南平獻俘于朝帝為告謝郊廟受
百官賀大學士申時行以下悉進官廕子緝亦進副總
兵予世廕乃改孟寨安撫司為宣撫增設安撫二曰蠻
莫曰耿馬長官司二曰孟璉曰孟璉千戶所二一居姚
關一居猛淋皆名之曰鎮安命緝以副總兵署臨元參

將移鎮蠻莫初鳳降本以計誘而巡撫世曾稱陣禽遂
行獻俘禮叙功及閣部未幾緬人復大舉寇孟密孟密
兵戰敗賊遂圍五章把總高國春率五百人援破賊數
萬連摧六營為西南戰功第一進官世廕副千戶緱亦
優叙蠻莫設安撫以上官思順有功特授之緱納其重
賄又縱部將謝世祿等淫虐思順大怨緱將家子父顯
部曲多健兒緱擁以自雄征緬之役勒兵金沙江築將
臺于王驥故址威名甚盛然性貪御下無法兵還至騰

衝甲而譟焚民居綆在蠻莫聞之馳至犒以金錢始定
思順恐禍及叛歸莽酋詔草綆任以遊擊候調無何羅
雄變起羅雄者曲靖屬州也者氏世為知州嘉靖時者
濬嗣職殺營長而奪其妻生子繼榮濬年老無他子繼
榮得襲職遂殺濬妖僧王道張道以繼榮有異相奉為
主用符術鍊丁甲煽聚徒黨獨外弟隆有義不從十三
年冬繼榮分黨四剽廣西師宗陸涼諸府州咸被患巡
撫劉世曾檄調漢土軍屬監司程正誼鄭璧等分禦之

會紆解官至霑益世曾喜令與裨將劉紹桂萬鰲分道討紆直搗繼榮寨拔之獲其妻妾數人繼榮逸去紆連克三砦斬王道張道追亡至阿拜江隆有義部卒斬繼榮首以獻賊盡平時首功止五十餘級而撫降者萬餘人論者稱其不妄殺初紆破繼榮有論其私財物者功不錄世曾為辨誣乃賜白金尋用為廣西參將移四川二十年召授五軍三營參將會朝鮮用師紆請率川兵五千赴援詔以副總兵從征至則倭已棄王京遁紆趨

尚州烏嶺嶺亘七十里峭壁通一線倭拒險別將查大受
祖承訓等間道踰槐山出烏嶺後倭大驚遂移駐金
山浦綏及承訓等進屯大邱忠州以金羅水兵布釜山
海口朝鮮畧定未幾倭遣小西飛納款遂犯咸安晉州
逼金羅提督李如松急遣李平胡查大受屯南原祖承
訓李寧屯咸陽綏屯陝川扼之倭果分犯諸將並有斬
獲倭乃從釜山移西生浦送王子歸朝鮮帝命撤如松
大軍還止留綏及遊擊吳惟忠合七千六百人分扼要

口總督顧養謙力主盡撤綖惟忠亦先後還屬播酋楊
應龍作亂擢綖四川總兵官綖戍朝鮮二年勞甚覲勘
功優叙乃賄御史宋興祖興祖以聞法當褫部議綖功
多請盡草雲南所加功級以副總兵鎮四川尋以應龍
輸款而青海寇數擾邊特設臨洮總兵官移綖任之二
十四年三月浩爾濟宰桑昆都呼赫達春塔布囊等掠
番窺內地綖部將周國柱等擊之莽刺川腦斬首百三
十有奇獲馬牛雞畜二萬計帝為告郊廟宣捷綖等進

秩予廕有差明年五月朝鮮再用師詔綖克禦倭總兵
官提督漢土兵赴討又明年二月抵朝鮮則楊鎬李如
梅已敗經畧邢玠乃分軍為三中董一元東麻貴西則
綖而陳璘專將水兵綖營水源倭亦分三路西行長據
順天壕砦深固綖欲誘執之遣使請與期會使者三反
綖皆單騎俟道中行長覘知之乃信期以八月朔定約
至期綖部卒洩其謀行長大驚逸去綖進攻失利監軍
參政王士琦怒縛其中軍綖懼力戰破之賊退不敢出

諸將三道進緹挑戰破之驅賊入大城已賊聞平秀吉
死將遁緹夜半攻奪粟林曳橋斬獲多石曼子引舟師
救陳璘邀擊之海中行長遂棄順天乘小艘遁班師進
緹都督同知世蔭千戶遂移師征楊應龍會四川總兵
官萬鰲罷即以緹代之時兵分八道川居其四川東又
分為二以綦江道最要令緹當之應龍熟緹才頗懼益
兵守要害二十八年正月諸將克丁山銅鼓嚴村遂直
搗楠木山羊簡臺三峒峒絕險賊將穆照等衆數萬連

營諸將憚之緹分兵攻其三面大戰于李漢壩生禽其
魁餘賊奔入峒乘勢克三關直搗峒前焚之賊多死盡
克三峒禽穆照及賊魁吳尚華是日緹督戰左持金右
挺劍大呼曰用命者賞不用命者齒劍鬪死者四十人
遂大捷應龍乃遣子朝棟惟棟及其黨楊珠統銳卒數
萬由松坎魚渡羅古池三道並進緹伏萬人羅古待松
坡賊以萬人伏營外待魚渡賊而別以一軍策應賊果
至伏盡起緹率部下轉戰斬首數百追奔五十里賊聚

守石虎關綖亦掘塹守初綖聞征播命逗遛多設難以要朝廷言官交劾議調南京右府僉書綖至是聞之即辭任總督李化龍以平播非綖不可固留之力薦于朝綖乃復受事踰夜卽舊城攻克賊滴淚三坡瓦窪坪石虎諸隘直抵婁山關婁山萬峯挿天叢箐中一徑纔數尺賊設木關十三座排柵置深坑百險俱備綖分奇兵為左右路間道趨關後而自督大軍仰攻奪其關追至永安莊兩路軍亦會綖老将持重慮賊衝突聯諸營一

據婁山關為老營一據白石口為腰營一據永安莊為前營都指揮王芬者勇而寡謀每戰輒請為前鋒連勝有輕敵心獨營松門埡之衝距大營數里賊方有烏江之勝謀再奪婁山適穆照遣使洩分孤軍狀賊乃襲殺芬守備陳大剛天全招討楊愈亦死夫亡士卒二千人緹聞親率騎卒往救部將周以德周敦吉分兩翼夾攻賊始大奔追至養馬城而還是日應龍幾被獲乃不敢窺婁山緹懲前失剴近關堅壁且請濟師踰十餘日克

後水圍營于冠子山尋會馬孔英吳廣諸軍逼海龍圍下與諸將共平賊綬功為多初李化龍薦綬言官謂綬嘗納應龍賄宜奪官從軍部議謫為事官戴罪辦賊綬德化龍使使齎玉帶一黃金百白金千投化龍家為化龍父所叱投巡按御史崔景榮家亦如之化龍景榮並奏其事詔草綬任永不收錄沒其物于官已錄平播功進左都督世廕指揮使三十六年雲南阿克反起綬討賊總兵官未至賊已平寢前命四十年四川建昌猱亂

綖為總兵官討之偕參政王之機分八道督諸將攻而已居中節制克桐槽沈渣阿都厦卜越北諸砦大小五十六戰斬馘三千三百有奇諸猺巢穴一空綖為將數被黜抑性驕恣如故嘗拳毆馬湖知府詹淑淑改調綖奪祿半年久之以軍政拾遺罷歸四十六年帝念遼警召為左府僉書明年二月經畧楊鎬令綖及杜松李如柏馬林四路出師綖兵四萬由寬甸副使康應乾監之遊擊喬一琦別監朝鮮軍並進綖鎮蜀久好用蜀兵久待

未至遂行而所分道獨險遠重岡疊嶺馬不成列次深河連克牛毛馬家二砦

大清兵五百守棟鄂路聞緹軍至逆戰緹縱兵圍數重大清兵衆寡不敵失二裨將傷五十人餘潰圍出緹已深入三百里杜松軍覆猶不知復整衆進遇

大清兵緹引軍登阿布達里岡將布陣

大清兵亦登岡出其上而別以一軍趨緹西岡上軍自高馳下奮擊緹軍緹殊死戰趨緹西者復從旁夾擊緹

軍不能支

大清兵乘勢追擊過綆後二營軍未及陳復為

大清兵所乘大潰綆戰死養子劉招孫者最驍勇突圍
手格殺數人亦死士卒脫者無幾時應乾及朝鮮軍營
富察之野

大清遂移師邀之應乾兵及朝鮮兵列械將戰狂風驟
起揚沙石應乾發火礮反擊已營大亂

大清兵趨擊大破之掩殺幾盡應乾以數百騎免一珣

亦為

大清兵所破走入朝鮮營朝鮮都元帥姜弘立副元帥
全景瑞懼率衆降一琦投崖死楊鎬聞杜松馬林師敗
馳召綖及李如柏還騎未至綖已覆獨如柏全事聞帝
遣中使祭陣亡將士恤綖家綖于諸將中最驍勇平緬
寇平羅雄平朝鮮倭平播酋平猱大小數百戰威名震
海內綖死舉朝大慄遷事日難為矣綖所用鎖鐵刀百
二十斤馬上輪轉如飛天下稱劉大刀天啟初贈少保

世廕指揮僉事立祠曰表忠一珩字伯珪上海人

李應祥湖廣九谿衛人以武生從軍積功至廣西思恩
參將萬歷七年巡撫張任大征十寨應祥與有功即其
地設三鎮築城列戍應祥方職營建會擢松潘副總兵
當事者奏留之以新秩涖舊任從總兵王尚文大破馬
平賊韋王明尋以署都督僉事入為五軍營副將十三
年改南京左府僉事出為四川總兵官松茂諸番列砦
四十八歲為吏民患王廷瞻撫蜀時嘗遣副將吳子忠

擊破丟骨人荒沒舌三砦諸酋乃降故事諸番歲有賞
賚番恃強要索無已其來堡也有下馬上馬解渴過堡
酒及熟衣氣力偏手錢戍軍更番亦奉以錢曰新班架
梁放狗躡草掛綵廷瞻一切除之西陲稍靖僅六七年
勢復猖獗是年夏楊柳番出攻普安堡犯歸水崖石門
坎遂入金瓶堡殺守將巡撫雖遵屬應祥討之提卒三
千入茂州克一砦番恃險剽如故無何遵罷徐元泰代
檄諭之使三反番不應窺蒲江關斷歸水崖黃土坎道

築牆五哨溝絕東南聲援見官軍少相顧笑曰如此磨
子兵奈我何磨子者謂屢旋轉而數不增也其冬突平
夷堡掠良民剗其腸繞二年角牛奔腸寸裂明年正月
遂圍蒲江關礮燬雉堞守將朱文達出斬數十人賊稍
解東南路始通元泰決計大征諸路兵悉集乃命遊擊
周于德將播州兵為前鋒遊擊邊之垣將酉陽兵為後
拒故總兵郭成將叙馬兵扼其吭參將朱文達將平茶
兵擊其脇而應祥居中節制參議王鳳監之應祥令軍

中各樹赤白幟一良民陷賊者徒手立赤幟下熟番不
附賊者徒手立白幟下即免罪番雖多遇急不相救國
師喇嘛者狡猾聯姻青海酋必圖與旺忠章喀等刻木
連大小諸姓軟血誑盟至是邀旺忠章喀先犯歸化以
嘗官軍于德誘禽喇嘛旺忠守備曹希彬復擊斬章喀
丟骨人荒沒舌三砦最强于德皆攻克復連破卜洞王
諸砦天達成之垣亦各拔數砦與于德軍合遂攻破蜈
蚣砦兒諸巢嘉靖初之垣祖輪以指揮討砦兒賊被殺

漆其頭為飲器及是六十年之垣乃得之以還葬焉賊
屢北窘悉棄輜重餌官軍官軍不顧斬關入賊多死河
東平尋渡河而西連破西坡西草歪地乾溝樹底諸巢
有小粟谷者首亂覘大軍西不設備郭成夜襲之大獲
牛尾砦尤險惡將士三路夾攻火其柵斬酋合兒結父
子河西亦平諸軍得所積粟留十日盡焚其砦以六
月班師其逃窮谷者求偏頭結賽乞降應祥令埋奴設
誓然後許之埋奴者番人反接其奴獻軍前譁天而誓

即牽至要路掘坎埋之露其首凡埋二十三人偏頭結
賽雅善天竺僧僧言歲在雞犬番有阮偏頭信之預匿
山谷中逸賊以為神跡而拜求之故偏頭為之請是役
也焚碣房千六百有奇生禽賊魁三十餘人俘馘以千
餘計自是群番震驚不敢為患邊人樹碑記績焉建昌
越嵩諸衛番獠雜居建昌逆酋曰安守曰五咱曰王大
咱與越嵩叩部黑骨夷並起為亂巡撫徐元泰議討徵
兵萬八千仍以文達之垣分將應祥統之副使周光鎬

監其軍十一月光鎬先渡瀘黑骨與大咱已據相嶺焚
三峽橋五咱等亦寇禮州德昌二所時徵兵未集光鎬
先設疑以嘗相嶺賊賊果退據桐槽桐槽者大咱巢穴
也已而諸道兵盡抵越窩應祥令文達攻五咱之垣攻
大咱姑置黑骨夷弗問夜半走三百里抵禮州賊半渡
文達擊敗之遂渡河搗其巢之垣亦屢破桐槽大咱亡
入山谷中无何五咱據磨旗山挑戰官軍夾擊賊退保
毛牛山山延袤六七百里連大小西番界文達兵大破

之五咱西遁與安守合結砦西谿會所徵鹽井刺馬兵三千至猱獍跳躍類非人形諸番所深畏應祥偵賊將劫營乃潛移己營而令刺馬兵屯其處夜分賊來襲刺馬起擊之伏屍狼籍諸將遂進攻西谿逐北至磨砦七板番連兵圍五咱而令裨將田中科營麥達逼安守會謀者報守謀襲中科應祥夜飲材官高達勝三巨觥令率敢死士三百疾趨七十里抵麥達而伏守夜至遇伏被禽守為群寇魁守殪西南叩笮苴蘭靡莫諸酋皆震

怖商山四堡番乞降于之垣大小七板番乞降于文達
各埋奴道左呼號頽首誓世世不敢叛五咱勢窮走昌
州亦為裨將王言所獲土木安四兒者居連昌城中潛
剽掠于外至是知禍及率黨數百人走據虛郎溝諸軍
既滅五咱應祥遣之北示將討黑骨者四兒遂弛備將
士忽還軍襲之獲四兒復討大咱初大咱敗匿所親普
雄酋姑咱所大軍至姑咱懼密告裨將王之翰之翰搜
得大咱而黑夷酋阿弓等七人在大孤山亦先為之翰

所禽于是建昌越嵩諸番盡平上首功二千有奇撫降者三千餘人時萬歷十五年七月也邛部屬夷臧乃者地近馬湖其酋撒假與外兄安興木瓜夷白祿雷坡賊楊九乍等數侵掠內地巡撫曾省吾議討之會有都蠻之役不果乃建六堡益戍兵千二百人而諸蠻鴟張如故及建越興師又藏納叛人元泰乃令都指揮李獻忠等分勦賊詐降誘執獻忠等三將殺士卒數千人勢益猖獗應祥等師旋元泰益徵播州酉陽諸土兵合五萬

人令應祥督文達之垣及周于德諸將三道入故總兵郭成亦從征十一月于德首敗白祿兵追至馬蝗山懸索以登賊潰乘勢攻木介夷射殺白祿追至利濟山雪深數尺于德先登復大敗賊燬其巢初撒假與九乍率萬人據山播州兵擊走之至是文達復破之大田壩合于德兵追逐所向皆捷遊擊萬鰲躡擊撒假于鼠囤獲其妻子郭成復至三寶山大戰生禽撒假安興據巢守文達鑿分道入獲其母妻安興擲金于途以緩追者遂

得脫已諸軍深入竟獲之他夷探畏威降者二千餘人
悉獻還土田願修職貢兵乃罷凡斬首一千六百九十
餘俘獲七百三十有奇以其地置屏山縣論功應祥屢
加都督同知元泰亦至兵部尚書當是時蜀中劇寇盡
平應祥威名甚著御史傅霈按部詰應祥冒饗應祥賄
以千金為所奏罷職兵部舉應祥僉書南京右府給事
中薛三才持不可二十八年大征播州貴州總兵官童
元鎮逗遛總督李化龍劾之薦應祥代時分兵八道貴

州分烏江興隆二道詔元鎮充為事官由烏江入應祥
由興隆入諸道尅二月望進兵應祥未受事副將陳寅
等已連克數岡拒賊四牌高岡下別遣兵從間道直搗
龍水岡他將蔡兆吉又自乾坪抵箐岡過四牌賊首謝
朝俸營其地四面峭壁深箐前二關賊從高鼓譟官軍
殊死戰俘朝俸妻子乘勢抵河畔會烏江敗書聞斂兵
不進者旬日及應祥受任益趣諸將急渡寅等乃取他
道渡河而潛為浮橋以濟師諸軍渡賊失險乞降者相

繼應祥悉受之賊所恃止黃灘一關壁立衆死守會賊徒石勝俸等率萬餘人降告曰去黃灘三十里有三關入播門戶也先襲破之則黃灘孤難守應祥然其計令偕陳寅率精兵四千夜抵關下勝俸以數十騎誘其開門殲其戍卒黃灘賊懼寅督諸將渡河攻關前勝俸由墳林暗渡襲關後賊乃大敗應祥直抵海龍國合諸道兵共滅楊應龍播既平還鎮銅仁明年改鎮四川播遺賊吳洪盧文秀等惡有司法嚴而遵義知縣蕭鳴世失衆

心洪等遂稱應龍有子聚衆為亂應祥偕副使傅光宅捕之盡獲應祥尋卒于官以平播功贈左都督世蔭千戶應祥為將謀勇兼資所至奏績平蜀三大寇功最多董元鎮桂林右衛人萬歷中為指揮從討平樂賊莫天龍有功屢遷遊擊將軍高江猺反從呼良朋破平之歷永寧潯梧參將進副總兵擢署都督僉事為廣西總兵官未幾改廣東二十三年總督陳大科以元鎮熟蠻事仍移廣西岑溪西北為上下七山介蒼藤間有平田黎

峒白板九密等三十七巢東南為十三山有孔亮陀田桑園古攬魚修等百餘巢與廣東羅旁接山險箐深環數百里無日色賊首潘積善等據之以為民患及羅旁平積善懼乞降為設參將于大峒兵千餘戍之其後將領多培克士卒又疲弱賊復生心時出剽會歲饑粵東亡命浪賊數百人潛入七山誘諸徭為亂元鎮先以參將成岑溪得諸徭心至是積善及其黨韋月咸願招撫自効十三山諸徭多受約束有訛言將勦北科徭者諸

署督撫陳大科戴耀屬元鎮討之當副將陳璘參將吳
廣罷官里居大科起令將兵與元鎮並進賊伐大木塞
道環佈簏簽元鎮佯督軍開道而潛從小徑上孔亮山
賊憑高弩矢雨下諸軍用火器攻大破之俘馘千五百
有奇餘招撫復業時府江韋扶仲等亦據險亂元鎮與
參政陸長庚謀募孫為間乘夜獲其妻子誘出劫伏兵
禽之餘黨悉平元鎮以功增秩賜金會日本破朝鮮廷
議由浙閩泛海搗其巢牽制之乃改元鎮浙江既而事

寢移鎮貴州二十八年李化龍大征楊應龍令元鎮督
永順鎮雄泗城諸土軍由烏江進元鎮憚應龍久駐銅
仁不進屢趣乃行時劉綎吳廣諸軍已進羣賊議分兵
守其黨孫時泰曰兵分則力薄乘官軍未集先破其弱
者餘自退矣應龍善之聞元鎮發烏江應龍喜曰此易
與耳謀縱之渡江密以計取監軍按察使楊寅秋言烏
江去播不遠宜俟諸道深入與俱進元鎮不從于是永
順兵先奪烏江賊遣千餘人沿江叫罵以誘之諸軍既

濟復奪老君關前哨參將謝崇爵乘勢督泗城及水西兵再拔河渡關三月望賊以步騎數千先衝水西軍軍中驅象出戰賊多傷俄駕象者斃象反走擲火器者又誤擊己營陣亂泗城兵先走崇爵亦走爭浮橋橋斷殺溺死者數千人河渡既敗烏江相去六十里猶未知明日參將楊顯發永順兵三百出哨道遇賊數萬咸為水西裝永順兵不之疑賊掩殺三百人亦襲其裝直趨烏江烏江軍信為水西永順軍不設

備遂為賊所破爭先渡江賊先斷浮橋士卒多溺死
顯及二子與焉元鎮所部三萬人不存什一將校止
崇爵等三人江水為不流貴陽聞警居民盡避入城
遠近震動化龍用上方劍斬崇爵益徵兵檄鎮雄土
官隴澄邀賊歸路隴澄者即安克臣水西安疆臣
弟也軍不與元鎮合獨全當事頗疑其通賊寅秋
以鎮雄去播止二日令搗巢立效澄許之河渡未
敗時澄已遣部將劉岳王嘉猷攻拔苦竹關及半

壩嶺暨敗二將移新站賊伏兵大水田別以五千人來襲敗還嘉猷乃揚聲搗大水田而潛以一軍拔大夫關直抵馬坎斷賊歸路與疆臣合賊遂遁會都指揮徐成將兵至合泗城土官岑紹勲兵再克河渡關賊將張守欽袁五受據長箐萬大林永順兵擊破之生禽守欽攻清潭洞復擒五受會朝議責元鎮敗狀令李應祥并將其軍遂合水西鎮雄諸部直抵海龍囤竟滅賊兵初興元鎮坐逗遛謫為事官及是逮至京下吏罪當死法司

援前岑溪功調戍烟瘴遇赦廣西巡撫戴耀為請部議
不許竟卒于戍所

陳璘字朝爵廣東翁源人嘉靖末為指揮僉事從討英
德賊有功進廣東守備與平大盜賴元爵及嶺東殘寇
萬厯初討平高要賊鄧勝龍又平揭陽賊及山賊鍾月
泉屢進署都指揮僉事僉書廣東都司官軍攻諸良寶
副將李成立戰敗總督殷正茂請假璘參將自將一軍
賊平授肇慶遊擊將軍徙高州參將總督凌雲翼將大

征羅旁先下令鵬勦璘所破凡九十巢已分十道大征
璘從信宜入會諸軍覆滅之以其地置羅定州及東安
西寧二縣即遷璘副總兵署東安參將事未幾餘孽殺
吏民責璘戴罪辦賊璘會他將朱文達攻破石牛青水
諸巢斬捕三百六十餘人授俸如故時東安初定璘大
興土木營寺廟役部卒且勒其出貲卒咸怒因事倡亂
掠州縣為巡按御史羅應鶴所劾詔奪璘官既而獲賊
乃除罪改狼山副總兵璘有謀畧善將兵然所至貪黷

復被劾褫官廢久之朝士多惜其才不敢薦二十年朝鮮用兵以璘熟倭情命添注神機七營參將至則改神樞右副將無何擢署都督僉事充副總兵官協守薊鎮明年正月詔以本官統薊遼保定山東軍禦倭防海會有封貢之議暫休兵改璘協守漳潮坐賄石星為所奏復罷歸二十五年封事敗起璘故官統廣東兵五千援朝鮮明年二月擢禦倭總兵官與麻貴劉綎並將部卒次山海關鼓譟璘被責尋令提督水軍與貴綎及董一

元分道進副將陳蠶鄧子龍遊擊馬文煥季金張良相等皆屬馬兵萬三千餘人戰艦數百分布忠清全羅慶尚諸海口初賊泛海出沒官軍乏舟故得志及見璘舟師懼不敢往來海中會平秀吉死賊將遁璘急遣子龍偕朝鮮將李舜臣邀之子龍戰沒蠶金等軍至邀擊之倭無鬪志官軍焚其舟賊大敗脫登岸者又為陸兵所殲焚溺死者萬計時綏方攻行長驅入順天大城璘以舟師夾擊復焚其舟百餘石曼子西援行長璘邀之半

洋擊殺之殲其徒三百餘賊退保錦山官軍挑之不出
已渡匿乙山崖深道險將士不敢進璘夜潛入圍其巖
洞比明礮發倭大驚奔後山憑高以拒將士殊死攻賊
遁走璘分道追擊賊無脫者論功璘為首絀次之貴又
次之進璘都督同知世廕指揮僉事師甫旋會有征播
之役命璘為湖廣總兵官由偏橋進副將陳良玘由龍
泉受璘節制二十八年二月軍次白泥楊應龍子朝棟
率衆二萬渡烏江迎戰璘前禦之而分兩翼躡其後賊

少挫追奔至龍溪山賊合四牌賊共拒四牌在江外與
江內七牌皆五司遺種九股惡苗素助賊璘廣招撫乃
進軍龍溪偵知賊有伏令遊擊陳策用火器擊之賊據
險矢石雨下璘先登斬小校退者以徇把總吳應龍等
陷陣賊大潰退四牌保兒圍璘二裨將逼之中伏璘募
死士從應龍等奮擊賊復潰奔據囤巔夜由山後遁黎
明追及于袁家渡復敗之四牌之賊遂盡三月望諸軍
為浮橋渡江知賊將張佑謝朝俸石勝俸等營七牌野

豬山璘即夜發抵苦練坪前鋒與戰後軍至夾擊之賊
敗逃深箐官軍遂入苦菜關會童元鎮烏江師敗璘懼
請退師總督李化龍不可璘乃進營楠木橋次湄潭賊
悉聚青蛇長坎瑪瑙保子四圍地皆絕險而青蛇尤甚
璘議同日攻則兵力弱止攻一圍則三圍必相助乃先
攻三圍次及青蛇良玘師亦來會令伏圍後別以一軍
守板角關防賊逸璘督諸將力攻三日賊死傷無筭三
圍遂下青蛇四面陡絕璘圍其三面購死士從瑪瑙後

附葛至山背舉礮賊惶駭諸軍進攻焚其茅屋賊退入
國內木石交下將士冒死上毀大柵二重前後擊之賊
大敗斬首一千九百有奇七牌之賊亦盡乃分兵六道
攻克大小三渡關乘勝抵海龍囤下諸將俱攻囤前獨
水西安疆臣攻其後相持四十餘日其下受賊重賄多
與通且潛以火藥遺賊故賊不備其後璘知之與監軍
者謀令疆臣退一舍璘移其處置鐵牌百餘距囤丈許
賊強弩無所施又為箠板于柵前賊每夜出却為釘傷

不敢復出應龍勢窮相聚哭化龍初有令諸將分日攻
六月六日璘與吳廣當進兵璘夜四更銜枚上賊廵睡
斬其守關者樹白幟鳴礮賊大驚潰散應龍自焚廣軍
亦至賊盡平遂移師討皮林皮林在湖貴交與九股苗
相接有吳國佐者洪州司特峒寨苗也桀黠無賴其從
父大榮以叛誅國佐收其妾黎平府持之急遂反自稱
天皇上將其黨石纂太稱太保合攻上黃堡誘敗參將
黃冲霄追至永從縣殺守備張世忠矣而噉之掠屯堡

七十餘焚五開南城陷永從圍中潮所時方征播州未暇討既平播偏沅巡撫江鐸命璘與良玘合兵討之良玘失利明年鐸移駐靖州命璘率副將李遇文等七道進璘禽苗酋銀貢等遊擊宋大斌攻破特峒焚之國佐逃天浦四十八寨復入古州毛洞追獲之石纂太逃廣西上巖山指揮徐時達誘縛之賊黨楊永祿率衆萬餘屯白冲遊擊沈弘猷等夾攻生禽永祿諸苗悉平征播時璘投賄李化龍家會劉綎使為化龍父所麾璘使走

化龍疏于朝綬獲罪璘獨免後兵部尚書田樂推璘鎮貴州給事中洪瞻祖遂劾璘營求帝以璘東西積戰功卒如樂議貴東西二路苗曰仲家苗盤踞貴龍平新間為諸苗巨魁在水硯山介銅仁思石者曰山苗紅苗之羽翼也自平播後貴州物力大屈苗益生心剽掠無虛日三十三年冬巡撫郭子章請于朝明年四月令璘軍萬人攻水硯遊擊劉岳督宣慰安疆臣兵萬人攻西路並克之乃令璘移新添獨攻東路復克之生獲酋十二

人斬首三千餘級招降者萬三千餘人部內遂靖改鎮
廣東卒官先叙平播功加左都督世廕指揮使既卒以
平苗功贈太子太保再廕百戶吳廣廣東人以武生從
軍累著戰功歷福建南路參將坐事罷歸會岑溪徭反
總督陳大科檄廣從總兵童元鎮討之將士少却廣手
斬一卒以徇遂大破之論功復故官萬歷二十五年以
副總兵從劉綎禦倭朝鮮領水軍與陳璘相犄角俘斬
甚衆甫班師大征播州擢廣總兵官以一軍出合江副

將曹希彬以一軍出永寧受廣節制廣屯二郎壩大行招徠賊驍將郭通緒迎戰將士襲走之陶洪安村羅村三砦土官各出降他部來歸者數萬廣擇其壯者從軍通緒托穿崖因廣督土漢軍擊破之劉綏馬孔英已入播廣猶頓二郎總督李化龍起之乃議分四哨進攻崖門別遣永寧女土官奢世續等督夷兵二千扼桑木埡諸要害以防饒道諸將連破數囤進營毋豬塘楊應龍懼令通緒盡發關外兵拒敵廣伏礮手五百于磨搶埡

外南岡下而遣裨將趙應科挑戰垓夾兩山中甚隘通
緒橫梁衝應科應科佯北通緒追出垓遇伏急旋馬中
礮墜方躍上他馬伏兵攢刺之殪餘賊大奔官軍逐北
賊盡降遂薄崖門徑小止容一騎賊衆萬餘出關拒戰
希彬懸賞千金士攀崖競進追至第四關關上男婦盡
哭賊黨自殺其魁羅進思率萬餘人出降其第一關猶
拒不下廣乘夜疾進奪其關關內民爭獻牛酒劉綎馬
孔英已入關李應祥陳璘猶在關外廣合希彬軍連戰

紅碗水土崖分水關皆捷遂進營水牛塘應龍大懼知
廣軍孤深入謀欲襲之乃遣人詐降廣測其詐堅壁以
待應龍擁衆三萬直衝大營諸將殊死戰會他將來援
賊乃退廣遂與諸道軍逼海龍囤賊詐令婦人乞降哭
困上又詐報應龍仰藥死廣信之已知其詐急燒第二
關奪三山絕賊樵汲賊益窘旋與陳璘從囤後登應龍
急自焚死獲其子朝棟出應龍屍烈燄中廣中毒矢失
聲絕而復甦遂以本官鎮四川踰年卒初廣之頓二即

也有言其受賄養寇者詔謫充為事官後論功贈都督同知世蔭千戶

鄧子龍豐城人貌魁梧驍捷絕倫嘉靖中江西賊起掠樟樹鎮子龍應有司募破平之累功授廣東把總萬厯初從大帥張元勲討平巨盜賴元爵已從平陳金鶯羅紹清賊魁黃高暉逸子龍入山生獲之遷銅鼓石守備尋擢署都指揮僉事掌浙江都司被論當奪職帝以子龍犯輕會麻陽苗金道侶等作亂擢參將討之大破賊

解散其黨五開衛卒胡若盧等火監司行署撻逐守備
及黎平宇靖州銅鼓龍里諸苗咸響應為亂子龍火其
東門以致賊而潛兵入北門賊遂滅十一年閏二月緬
甸犯雲南詔移子龍永昌木邦部耿馬奸人罕虔與岳
鳳同為逆說緬酋莽應裏內侵虔從掠干崖南甸已引
渡查理江直犯姚關灣甸土知州景宗真及弟宗材助
之子龍急戰攀枝樹下陣斬宗真虔生獲宗材虔子招
罕招色奔三尖山令叔罕老率蒲人藥弩手五百阻要

害子龍餌蒲人以金盡知賊間道乃命裨將鄧勇等提
北勝滾渠諸番兵直搗賊巢而預伏兵山後夾擊夜半
上生禽招罕招色罕老及其黨百三十餘人斬首五百
餘級火山巢空乃撫流移數千人會劉綎亦俘岳鳳以
獻帝悅進子龍副總兵予世廕無何緬人復寇猛密把
總高國春大破之子龍以犄角功亦優叙自是蠻人先
附緬者多來附永昌騰衝夙號樂土自岳罕猖亂始議
募兵所募多亡命乃立騰衝姚安兩營劉綎將騰軍子

龍將姚軍不相能兩軍鬪帝以兩將皆有功置不問既而綏罷劉天俸代天俸逮遂以子龍兼統之子龍抑騰兵每工作輒虐用之而右姚兵及用師隴川子龍故為低昂椎牛饗士姚兵倍騰兵騰兵大不堪欲散去副使姜忻令他將轄之乃定而姚兵久驕因索餉作亂由永昌大理抵會城所過剽掠諸兵夾擊之斬八十四級俘四百餘人亂始靖子龍坐褫官下吏十八年益養賊思箇叛子龍方對簿巡撫吳定請令立功自贖帝許之命

未至定已與黔國公沐昌祚遣將却之無何丁改十寨賊普應春霸生等作亂勢張甚定大徵漢土軍令子龍軍其右遊擊楊威軍其左大破之斬首一千二百級招降六千六百人帝為告謝郊廟宣捷受賀復子龍副總兵署金山參將事先是猛廣土官思仁蒸其嫂甘線姑欲妻之弗克偕其黨丙測叛歸緬數導入寇二十年攻孟養犯蠻莫土同知思紀奔等練山子龍擊敗之乃去子龍尋被劾罷歸二十六年朝鮮用師詔以故官領水

軍從陳璘東征倭將渡海遁璘遣子龍偕朝鮮統制使
李舜臣督水軍千人駕三巨艦為前鋒邀之釜山南海
子龍素慷慨年踰七十意氣彌厲欲得首功急攜壯士
二百人躍上朝鮮舟直前奮擊賊死傷無算他舟誤擲
火砲入子龍舟舟中火賊乘之子龍戰死舜臣赴救亦
死事聞贈都督僉事世廕一子廟祀朝鮮

馬孔英者宣府塞外降丁也積戰功為寧夏參將萬歷
二十年已拜反引套寇入掠孔英屢擊敗之布色圖入下

馬關從麻貴邀擊大獲進本鎮副總兵二十四年九月
卓哩克圖宰桑犯平虜橫城孔英偕參將鄧鳳力戰斬
首二百七十有奇賜金幣令推大將缺乃擢署都督僉
事以總兵蒞舊任尋進秩為真二十七年卓哩克圖宰
桑復犯平虜興武孔英與杜桐等分道襲敗之再入又
敗之會大征播州楊應龍詔發陝西四鎮兵令孔英將
以往兵分八道孔英道南川獨險遠去應龍海龍囤六
七百里未至重慶推官高折枝監紀軍事請獨當一面

乃與參將周國柱先以石砭宣撫馬千乘兵破賊金筑
復督酉陽宣撫冉御龍敗賊于官壩孔英至軍平茶邑
梅兵亦集軍容甚壯先師期一日入真州用土官鄭葵
路麟為鄉道別遣邊兵千扼明月關諸軍鼓行前連破
四寨次赤崖抵清水坪封寧關破賊營十數逼桑木關
關內民降者日千計折枝結三大砦處之禁殺掠降者
日衆賊益孤關為賊要害山陰箐深賊憑高拒乃令千
乘御龍出關左右國柱搗其中賊用標槍藥矢銳甚官


軍殊死戰奪其關逐北至風坎關賊復大敗連破九杆
黑水諸關苦竹羊崖銅鼓諸寨國柱攻金子壩無一人
疑有伏焚空砦十九嚴兵以待賊果突出擊敗之孔英
乃留王之翰兵守白玉臺衛饒道平茶邑梅兵守桑木
關而親帥大軍進營金子壩應龍聞桑木關破大懼遣
弟世龍及楊珠以銳卒劫之翰營之翰走殺饒卒無算
平茶兵來援賊始退孔英還擊世龍復却裨將劉勝奮
擊賊乃奔官軍進朗山口由朗山進蒙子橋深箐翁翳

賊處處設伏悉勦平之應龍益懼遣其黨詐降謀為內
應折枝盡斬之伏以待珠果夜劫營伏發賊驚潰追奔
至高坪已奪賊養馬城直抵海龍第二關下賊守兵益
多孔英軍已深入而諸道未有至者酉陽延綏兵皆退
賊躡殺官軍六十人居數日劉綎兵至乃合兵連克海
崖海門諸關賊走保固上竟覆滅初總督李化龍尅師
期諸將莫利先入孔英所將邊卒及諸土兵皆獷悍監
紀折枝勇而有謀故師獨先入道圍海龍諸將以固後

易攻爭走其後孔英獨壁關前錄功進都督同知世廕
千戶久之以總兵官鎮貴州平金筑定番叛苗生擒首
惡阿包阿牙等已而欲襲黃柏山苗苗知之先發敗官
兵匿不報又誘執苗酋石阿四稱陣禽冒功為巡撫胡
桂芳所劾罷歸卒

贊曰播州之役諸將用命令八道師歷時五月僅乃克
之可謂勞矣劉綎勇畧冠諸將勞最多其後死事亦最
烈鄧子龍始事姚安名與綎埒垂老致命廟祀海隅昔

人謂武官不惜死兩人者蓋無愧于斯言也夫



明史卷二百四十七

欽定四庫全書

明史卷二百四十七考證

劉鋹傳參將鄧子龍擊斬罕虔於姚關

臣方煒按鄧

子龍傳子龍斬罕虔於姚關時並生禽招罕招色罕
老及其黨百三十餘人斬首五百餘級謹識

劉綎傳兵還至騰衝甲而譟焚民居

臣方煒按明神

宗實錄兵還至騰衝焚城中民居一百七十餘家謹

識

劉綖傳詔革綖任以遊擊候調

臣方燁按綖革任緣

撫按官奏綖受思順金寶牙錦諸物又縱把總謝世
祿夏世勲陳其正等淫虐使其情甚不堪倉皇出奔
宜治綖罪事詳明神宗實錄謹識

劉綖傳詔綖革任永不收錄

臣方燁按綖革任傳言

緣化龍景雲奏使使齎玉帶黃金事考明神宗實錄
景雲叅綖驕恣侮慢未及使使齎金玉帶事紀載互
異謹識

劉綎傳立祠曰表忠

臣方煒按劉綎於乾隆四十一年

年

賜謚忠壯謹識

李應祥傳時分兵八道

臣方煒按八道謂烏江興隆

及綦江南川合江永寧沙溪偏橋龍泉詳李化龍傳

謹識

陳璘傳吳廣附坐事罷歸

臣方煒按坐事罷歸史未

詳何事他書亦無可考謹識

鄧子龍傳詔移子龍永昌 臣方煒按移子龍永昌傳

未詳其原委考明神宗實錄時緬賊莽酋犯永昌騰
越先是永昌叅將已裁革永騰獨守脩一人撫臣劉

世會請以湖廣叅將鄧子龍為永昌叅將報可謹識

鄧子龍傳既而綈罷劉天俸代天俸逮遂以子龍兼統

之 臣方煒按綈罷事已詳綈傳至下文劉天俸逮

及後文子龍下吏並被劾史俱未詳何事他書亦無

可考謹識